



“Nos no ta laga ningun di boso atras; ban sigui riba e bon direccion”



E PATIO di Fort Zoutman tabata yen di hende cu a bin pa presencia e ceremonia di entrega di certificado n'e hobennan di grupo 5 di Formacion Social. Entre e varios invitadonan por a nota presencia di Comandante Ten Hove, miembronan di Parlamento, mayornan, famia, amigo, maestronan di 'Enseñansa pa Empleo', representantenan di companianan cu ta ofrece stage, e hobennan di SVT number 6 y 7 y otro interesadonan.

Prome Minister Eman a pidi tur hende lanta para pa duna e hobennan cu a slaag un aplauso fuerte.

Den su discurso Eman a bisa cu e programa a demostra su balor dor di e resultadonan cu tin. "SVT a demostra na mayor y e hobennan cu ya a gradua cu ora e escogencia wordo haci pa duna hobennan un oportunidad mas den bida cu nan ta gara e oportunidad

aki y ta haci algo grandi pa cambia e direccion di nan bida." Eman a splica cu e programa a inicia cu apoyo di diferente instancia tanto di Aruba como di Reino.

"Nos a haya financiamiento p'e prome tres añanan cu tabata un combinacion di Gobierno di Aruba y esun di Hulanda. Nos ta considera e proyecto aki asina importante cu ora financiamiento di Hulanda a termina, nos a dicidi cu Gobierno di Aruba ta carga full e responsabilidad pa continua cune, pero si contando cu e apoyo continuo di MariniersKazerne." Eman a dirigi su mes na Comandante Ten Hove pa gradici'e pa su sosten y cooperacion. Durante su discurso Eman tabatin palabranan di reconocimiento p'e

empresanan cu ta brinda 'stageplekken' p'e hobennan. Di biaha el a pidi nan pa considera tuma e stagierenan den servicio ora nan caba nan periodo. Esnan cu a y ta core stage den Parke Arikok p.e. a haya e trabou masha interesante y lo kier traha eyden. Asina ta cu si vacatura pa corda riba nan. Continuando Eman a bisa cu durante cu e programa ta existi tin dos grupo cu merece tur elogio pa local e hobennan ta presta. "Na di prome lugar ta e hoben mes. E hoben cu na un momento crucial den su bida ta dicidi cu e ta bay gara e oportunidad pa por yega na forma su mes di un manera cu ta bin mas claridad riba su oportunidadnan den mundo y su bida diario."

Prome Minister a dirigi su mes aki n'e hobennan di gruponan 6 y 7. Grupo 6 ta coriendo stage y e ultimo grupo ta canando actualmente e caminda dificil

cu ta consisti di 4 luna den kazerne. Tambe Eman tabatin masha palabra di elogio pa e trabounan cu Arumil ta haciendo. E di dos grupo ta e mayornan y famia. "Nos ta mira asina tanto bes cu e hobennan ta conta riba e sosten di e mama, e tata, e ruman, e wela, e welo cu ta sostene nan di por haci e escogencia aki.

E personanan aki merece un aplauso grandi awe, pasobra ta nan ta carga boso te yega na e punto unda mester yega". Docentenan di Enseñansa pa Empleo tambe a haya aplauso pa nan dedicacion. Nan final Eman a desea e hobennan cu ta den e programa hopi exito den futuro. "Esnan cu a gradua por conta cu nos lo sigui tey pa nan. E dicho importante: 'Nos no ta laga ningun hende atras' ta aplicabel aki. Nos no ta laga ningun di boso atras. Ban sigui riba e bon direccion".